

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- लेफ्टिनेंट गवर्नर मनोज सिन्हा होरें आखेआ ऐ जे राश्ट्र पिता महात्मा गांधी हुंदे निस्वार्थ सेवा ते जिम्मेदारी निभाने दे आदर्श, विकसित भारत दे निर्माण दी जातरा च साढ़ा सबनं दा मार्गदर्शन करडन।
- उपमुख्यमंत्री सुरिंदर चौधरी होरें नौशैहा च त्रै पुलें दे निर्माण लेई नीह पत्थर रक्खे ते कलसियां च इक जनता दरबार बी लाया।
- जनजातीय मामलें आहले मैहकमे दे मंत्री जावेद अहमद राणा होरें पुंछ दे मँडर इलाके च आयोजित सागरा मेले दरान जनजातीय समुदास दे मुल्लें-कदरें दी हिफाजत लेई सांझे ते ठोस जतनं दी हिमायत कीती।
- जम्मू खिते दे बक्ख-बक्ख इलाकें च कल साफ-सफाई, सेवा ते समाजी जिम्मेदारी दे संदेस दे कन्नै सेवा पर्व 2025 संपन्न होई गेआ ऐ।
- मौसम विभाग ने आखेआ ऐ जे पच्छमी ब्हाएं च खौदल करी, औंदी 4 थमां 7 अक्टूबर तगर जम्मू-कश्मीर च भारी बरखा ते उच्चिएं धारें पर बर्फबारी दे असार न।
- हून खबरें दी तफसील कन्नै सोनाली दत्ता।

<><><><><><>

LG-Bapu Ji

उपराज्यपा मनोज सिन्हा होरें कल श्रीनगर च राश्ट्रपिता महात्मा गांधी होरें गी उन्दी जयंती पर श्रद्धांजलि भेंट करदे होई आखेआ जे बापु हुंदे सुखने गी प्रधानमंत्री नरेंद्र मोदी हुंदे नेतृत्व आहली सरकार आसेआ साकार कीता जा'रदा ऐ। सिन्हा होरें आखेआ जे गांधी जी हुंदे सिद्धांत जियां के निस्वार्थ सेवा ते कर्तव्य जिंदे लेई ओह बचनबद्ध हे, एह असेंगी अपनी विकसित भारत दे सफर दा मार्गदर्शन करोआडन।

उनें इब्बी गलाया जे आर्थिक समृद्धि दे कन्नोकन्नी अस ऐसे समाज दे निर्माण लेई प्रतिबद्ध हां जेड़े सामाजिक समानता ते न्यास पर आधारित होइन। इस बारे गल्ल करदे होई उनें आखेआ।

<><><><><><>

Dy CM-Bridges

उपमुखमन्त्री सुरिंद्र चौधरी होरें 3 पुलें दी परियोजनाएं लेई नीह पत्थर रखेआ जेड़े नौशहरा तगर दे शिड़क संपर्क गी बढ़ावा देडन। इन्दे च अंद्रुथ च नाबार्ड दे अंतर्गत अंद्रुथ नाले पर फुटपाथ सने 50 मीटर मोटरेबल पुल जेदी लागत 292 लक्ख ऐ। रतन गला कलसियां च 28 मीटर मोटरेबल पुल, जेदी लागत तकरीबन 284 लक्ख ऐ ते अंद्रुथ नाले पर गै 50 मीटर दा पुल जेदी लागत 400 लक्ख रपे ऐ। इनें त्रवें परियोजनाएं गी मंजूरी दिती गई। लोकें उप-मुखमन्त्री हुंदा इनें पुलें दी नीह रखने लेई शुक्रिया कीता। अपने दौरे दरान उनें कलसियां च इक लोक दरबार बी रखेआ ते कई लोकें दे मसलें दा उस्सै बेल्ले नबेड़ा कीता।

<><><><><><>

Rana-Tribal

जनजातीय मामलें आहले मैहकमे दे मंत्री जावेद अहमद राणा होरें पुंछ दे मेंढर इलाके च आयोजित इक जनजातीय मेले च कल हिस्सा लैता। जनजाती समुदास दी सगोसार संस्कृति ते विरासत दा जश्न मनाने लेई आयोजित इस कार्यक्रमै दरान बोलदे होई मंत्री होरें जोर देइयै आखेआ जे पीर पंजाल दे जनजाती समुदायें दी पन्छान दी राक्खी-हिफाजत लेई तरक्की दे कन्नो-कन्नी सांस्कृतिक परंपराएं दा सम्मान बी कीता जाना लोइचदा ऐ। उनें आखेआ जे मुखमन्त्री ओमर अब्दुल्ला हुंदी अगुवाई आहली जम्मू-कश्मीर सरकार, जनजातीय समुदाय दी विरासत दे कन्नो-कन्नी उंदा विकास जकीनी बनाने लेई कम्म करा'रदी ऐ। मंत्री जावेद राणा होरें इस मौके पर आखेआ

इस मेले दरान खाने-पीने दिएं पारंपरिक चीजें, औषधीय गुणें आहले बूहटें ते मुफ्त मेडिकल कैंप दे राहें जनजाती समुदाय दी समृद्ध विरासत गी बड़े शैल ढंगगै'नै प्रदर्शित कीता गेआ।

<><><><><><>

GST-Stationery Items

सरकारें पढ़ाई-लिखाई यानि स्टेशनरी समेयान पर जीएसटी कटौती कीती ऐ जेदे कन्नै विद्यार्थिएं गी मती राहत मुहैया करोआई गई ऐ ते खुदरा विक्रेताएं गी पेंसिल, कापिएं, रबड़ ते शार्पनर पर जीएसटी घट्ट करियै इसी सिफर करी दिता ऐ जेड़ा पैहले थमां 5 थमां 12 फीसद दी दर थमां घट्ट ऐ। जमेटरी बॉक्स ते गणितीय सरबन्धी उपकरणें दे सेटें गी हून सिर्फ 5 फीसद जीएसटी दी दर कन्नै आकर्षक बनाया गेआ ऐ। इस गेंs कन्नै जरूरी शैक्षणिक उपकरणें गी होर किफायती ते पुज्ज योग बनाने दी मेद ऐ। इक मुकामी दुकानदार नै आभार जतांदे होई आखेआ जे इस कटौती कन्नै बिक्री च इजाफा करियै बिचौलियें गी बी फायदा होग। आकाशवाणी कन्नै गल्ल करदे होई विद्यार्थी नै आखेआ।

<><><><><><>

Sewa Parv

सेवा पर्व 2025 दा समापन जम्मू खिते च बक्ख-बक्ख समारोहें ते व्यापक जनभागीदारी कन्नै होआ। 15 दिन चलने आहले इस अभियान दरान बक्ख-बक्ख समारोह कराए गए जिंदा मकसद साफ-सफाई, पर्यावरण संरक्षण ते सामाजिक जिम्मेदारी हा। बसोहली दे अटल सेतू उप्पर बी इक बड़्डे पैमाने पर सफाई अभियान चलाया गेआ जेदे च अधिकारिएं ते लोकें बधी चढ़ियै हिस्सा लैता। डोडा च बी सफाई कर्मचारिएं गी सम्मानित कीता गेआ ते कई सारे ग्राएं च बूहटे लाने दा अभियान चलाया गेआ। उधमपुर च टी.बी दे मरीजें गी पोषण किट्टां आवास योजनाएं दे तैहत मंजूरी पत्र बंडे गए ते टी.बी जागरूकता अभियान चलाए गए।

अधिकारिणं नागरिकेणं गी साफ-सफाई लेई वंचित वर्गें दा समर्थन करने लेई ते गांधीवादी मूल्यें गी बनाए रखने लेई आग्रह कीता। आकाशवाणी कन्ने गल्ल करदे होई उधमपुर दी डीसी सलोनी राएं होरें आखेआ.....

<><><><><><>

SMVD-Drive

लेफ्टिनेंट गवर्नर मनोज सिन्हा हुंदे दिशा-निर्देशें हेठ श्री माता वैश्वो देवी श्राइन बोर्ड दे चेयरमैन होरें गी रियासी जिले दे सरकारी स्कूलें च हाल च होई दी बरखा ते ल्हास-पस्सियां पौने करी होई दी तबाही दा जायजा लैने आस्तै ते उत्थे नवीनीकरण अभियान चलाने आस्तै आखेआ गेआ ऐ। श्राइन बोर्ड दी इस पहलकदमी दा मकसद स्कूली छात्रागत गी तौले शा तौले बहाल करना ऐ तां जे विद्यार्थी अगैर कुसै रूकावट दे अपनी पढ़ाई जारी रखी सकन। श्राइन बोर्ड उस क्षेत्र दे विद्यार्थियों दी पढ़ाई च समर्थन देने ते समुदायें दी बेहतरी आस्तै बचनबद्ध ऐ।

<><><><><><>

Bharat Darshan Tour

नौजवानें गी प्रेरित करने दे इक जतन दे तैहत जम्मू दे डीआईजी शिव कुमार शर्मा होरें कल जम्मू जिले दे 95 विद्यार्थिणं गी गुलशन ग्राउंड थमां भारत दर्शन दौरे लेई झंडी दस्सियै रवाना कीता। हफ्ते भरें दे इस कार्यक्रम दा आयोजन सिविक एक्शन प्रोग्राम आहली पैहलकदमी दे तैहत कीता गेदा ऐ ते इस दरन विद्यार्थिणं गी दिल्ली ते मुंबई दे दौरे पर लेता जा'रदा ऐ। इस दौरे दा मकसद विद्यार्थिणं गी भारत दी सगोसार संस्कृति, विरासत ते विकास दे खेतर च हासल उपलब्धिं बारै जानकार बनाना ऐ। अधिकारिणं मेद बुज्झी ऐ जे एह दौरा विद्यार्थिणं गी नमियां चीजां सखाने दे कन्नो-कन्नी उ'ंदे अंदर राश्ट्री गर्व दी भावना भरने च बी बड़ा कारी दा साबत होग।

<><><><><><>

Dussehra

विजयशमी यानि दशैहरे दा पर्व कल समूलचे जम्मू खिते च बड़े जोश ते धर्मिक जज्बे कन्नै मनाया गेआ। बुराई उप्पर अच्छाई दी जित दे प्रतीक इस ध्यार दे दरान कल बक्ख-बक्ख थाहें पर रावण, कुंभकरण ते मेघनाद दे पुतले फुक्के गे जि'नेंगी दिक्खने आस्तै खरी मती गिनतरी च लोक किट्ठे होए। इस मौके पर आयोजित सांस्कृतिक कार्यक्रमें, राम लीला दिएं प्रस्तुतिएं ते झांकिएं, इस जशन च चार-चन्न लाने दा कम्म कीता। मुकामी प्रशासनें एकड़े कार्यक्रमें गी बवस्थित ढंग्गै सिर करोआने लेई सुरक्षा ते ट्रैफिक सने, होर बी दुए लोड़चदे सब्बै बंदोबस्त कीते दे हे। इ'नें कार्यक्रमें एकता ते परंपरा दी झलक बी पेश कीती ते सबनें उम्मी दे लोक, बुराई उप्पर अच्छाई दी जित दे गवाह बनने लेई खरी मती गिनतरी च इ'नें कार्यक्रमें च शामिल होए।

<><><><><><>

Weather

मौसम विभाग ने औंदी 4 ते 7 अक्तूबर बश्कार पच्छमी ब्हाएं च खौदल करी जम्मू-कश्मीर च मौसम खराब रौहने दी भविक्खवाणी कीती ऐ। इस दरान प्रदेश दे उच्चे प्हाड़ी इलाकें च बर्फबारी होने ते कन्नै हौली थमां दरम्याने दर्जे दी बरखा बरने दे असार न ते मौसम च इस तब्दीली कन्नै तापमान च बी खरी मती गिरावट दर्ज कीती जाहंग। एहदे अलावा पहलगाम, गुलमर्ग ते सोनामर्ग ज्नेय इलाकें च भारी बर्फबारी दा अंदाजा बी जताया गेआ ऐ। प्रदेश दे पदरे इलाकें च इस अवधि दरान दरम्याने दर्जे थमां बड़ी भारी बरखा बरने दे असार न जदके जम्मू संभाग दे इलाकें च बी गरज चमक कन्नै भारी बरखा बरने ते अंधी-झक्खड़ झुल्लने दी भविक्खवाणी कीती गई ऐ। मौसम विभाग ने इस अवधि दरान केईं थाहें पर ल्हास-पस्सियां ते कुप्पड़ पौने दे खतरे बारे बी खबरदार कीता ऐ।

<><><><><><>